

Equu Search ta desmenti e asunto di 200 mil dollar

Tambe nan ta lamenta actitud di prensa Mericano

ORANJESTAD (AAN): Recientemente tabata worde bisa cu despues cu Equu Search a haya 20 mil dollar for di instancianan bancario di Aruba, awor famia Holloway y Twitty lo a pone presion riba embahada Mericano, pa pone presion riba Hulanda y Aruba, pa bin cu un suma di 200 mil dollar, pa yuda Equu Search.


E grupo di Equu Search a tuma nota di e insinuacion aki y a tuma contacto cu DIARIO pa aclarea e asunto.

DIARIO ayera a combersa cu lider di Equu Search, Tim Miller, kende a splica cu for di prome dia cu e grupo a yega, el a combersa cu Comisario van der Straten, kende tabata encarga cu e caso di desaparicion di Natalee Holloway, unda cu el a duna un splicacion amplio na e comisario.

El a splica cu tabata omo di Natalee esta Paul, kende a tuma contacto cu Equu Search cu ta un organizacion cu ta opera totalmente a base voluntario.

For di comienzo sr Miller a traha un acuerdo por escrito, unda cu a worde menciona kico e grupo lo ta treciendo Aruba, con nan lo ta operando y Miller a acorda di tuma contacto cu van der Straten por lo menos un biaha pa dia.

Tambe el a enfatiza cu Equu search no kier a haya



detayenan di e investigacion, pa si ora cu informacion lek, nan lo no por ta culpable den esaki.

Miller a splica tambe cu e trabaonan di e grupo lo no costa Gobierno di Aruba, Cuerpo Policial of e famia di Natalee ningun placa.

E grupo ta traha a base di donacionnan for di Merca y despues tambe e 20 mil dollar cu nan a haya for di e banconan local.

Na ningun momento un suma di 200 mil dollar a worde menciona of exige pa ningun hende, pa cu Equu Search.

Esaki segun Miller, kende a bisa cu ta duel y e ta sinti berguenza, pa e forma con diferente medionan di prensa Mericano ta usando e storia aki, unda cu diferente di nan

ta papia malo di cierto cosnan na Aruba.

El a bisa cu e tin dos nieta y cu sin pensa, e lo manda nan Aruba nan so cualkier dia, pa nan bin vakantie, mirando cu e ta haya cu Aruba ta un lugar hopi safe.

El a conta cu su mesun yiu muher a desaparece algun aña atras, unda cu despues di 17 luna nan a haya e curpa y cu te cu dia di awe, ainda no a haya e persona culpable.

Miller a aplaudi tur e esfuerzo cu comunidad di Aruba, Cuerpo Policial di Aruba y Gobierno di Aruba a haci y ta haciendo pa cu desaparicion di Natalee y ta pa e motibo aki e ta sinti berguenza pa e forma negativo con cierto prensa Mericano ta pinta Aruba y su sistema hudicial.

Miller a bisa di ta hopi agradecido pa e sosten cu el a haya for di pueblo di Aruba, cu ta un pueblo hopi amable y cariñoso.

Segun Miller e incidente isola aki, no por ta e chempel di con Aruba ta.

El a splica cu na Merca tin asina hopi caso di crimennan cruell, cu ta increíble cu prensa Mericano ta haci como si fuera Aruba ta un lugar hopi peligroso.

Miller a gusta Aruba asina tanto cu el a bisa cu dentro di algun luna despues cu nan a termina na Aruba e lo bin back pa vakantie y e ta bay wak si e por compra un cas, pa e por quizas biba aki 6 luna den un aña.

DIARIO a puntra Miller den ki forma Equu Search ta usando por chempel e 20 mil dollar cu nan a haya for di e banconan local.

El a splica cu cierto di e equiponan cu nan ta usa manera e equipo di "Sonar" ta

costa 700 dollar pa dia.

E gastonan cu nan tin pa cu nan telefonnan ta alrededor di 400 dollar pa dia.

En total, Equu search su gastonan segun Miller ta alrededor di 1400 dollar pa dia.

El a bisa cu e ta comprende dolor di e famia di Natalee, pasobra e tambe a pasa aden y el a splica cu mescos cu el a experiencia, ningun esfuerzo ta suficiente den wowonan di e mayornan, pasobra nan ta hopi desespera.

Segun Miller ainda tin 17 persona di e grupo na Aruba, unda cu dia 13 e grupo ta regresa Merca.

El a bisa cu e ta gradici tur esnan cu a yuda su grupo aki na Aruba, unda cu Equu Search a haya hopi cooperacion.

El a splica cu si su grupo haya Natalee, morto of bibe, nan lo no kier ningun clase di recompensa, nan no ta haci nan trabao, pa nan gana placa.

Ministerio Publico ta apela decision di Huez

Comisario pa loke ta e rumannan Kalpoe

ORANJESTAD (AAN): Ayera tardi Ministerio Publico a manda un comunicado pa prensa cu ta indica cu e ta apela e decision di Huez Comisario, cu a pone e dos rumannan Kalpoe den libertad.

Tambe Ministerio Publico a apela e decision di Huez Comisario den cua el a kita e limitacionnan cu tabata tin riba e sospechoso Joran van der Sloot y e decision pa admiti e abogado di e sospechosona na e interrogacionnan di polis.

Segun e comunicado e abogado di e sospechoso J.v.d.S a apela e decision di huez comisario den cua e

huez comisario ta ordena cu J.v.d.S tin cu keda cera pa 60 dia mas.

E fecha exacto riba cua e

casonan aki ta worde trata door di tres huez di Corte Superior no ta conoci ainda.